

**Siunnersuut uunga: Ilinniarnertuunngorniartarneq pillugu Inatsisartut inatsisaat nr.**

**xx, xx.xx 2011-meersoq**

*(Ilinniartitaanermut, Ilisimatusarnermut, Nunanullu Avannarlernut Suleqateqarnermut  
Naalakkersuisumit saqqummiunneqartoq)*

**pillugu**

**Kultureqarnermut, Ilinniartitaanermut, Ilisimatusarnermut, Ilageeqarnermullu  
Ataatsimiititaliap**

**ISUMALIUTISSIISSUTAA**

**Siunnersuutip aappassanneernerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Jane Petersen, (Inuit Ataqtigiit), Siulittaasoq

Inatsisartunut ilaasortaq Niels Thomsen, (Demokratit), Sinnisussaq

Inatsisartunut ilaasortaq Hans Aronsen, (Inuit Ataqtigiit)

Inatsisartunut ilaasortaq Ruth Heilmann, (Siumut)

Inatsisartunut ilaasortaq Aleqa Hammond, (Siumut)

UKA 2011-mi ulloq 22. september 2011-mi siullermeerlugu suliarineqarnerata kingorna  
siunnersuut ataatsimiititaliamit misissorneqarpoq.

**Siunnersuutip imarisaa siunertaalu**

Ilinniarnertuunngorniartarnermik aqqissuusseqqinnermi inatsisitigut tunngavissatut  
siunnersuut isigineqassaaq. Ilinniarnertuunngorniartarnermik aqqissuusseqqinnermi  
Naalakkersuisut pingaarnertut siunertaraat nunatsinni ilinniarnertuunngorniartarnerit  
ineriartortinneqarnissaat, taamaalilluni inuusuttut amerlanerusut  
ilinniarnertuunngorniartarnermik naammassinnittaqqullugit, tamatumalu peqatigisaanik

ilinniakkanik ilisimasaqalerneq nukittorsarneqassalluni nunallu tamat akornanni ilinniarnermi pisinnaasat pigiinnarneqassallutik.

Ilinniarnertuunngorniartarnermik aaqqissuusseqqinnerup Kalaallit Nunaanni ilinniarnertuunngorniartarneq tamatigoornerusooq pilersissavaa, tassani ataatsimut tunngaviumik ilinniarneq aallaavigalugu ilinniakkat sammivii assigiinngitsut ilinniartut ataasiakkaat pisinnaasaannik soqutigisaannillu isiginninniarfiusut akornanni toqqaasinnaallutik. Ilinniarnertuunngorniartarnermik aaqqissuusseqqinnermi ilinniartut assigiinngiiaartut piumassuseqarnerat ilikkagaqartarnerlu annertunerusumik nukittorsarneqassapput. Inatsisissatut siunnersuutikkut siunnersuutigineqarpoq ilinniarnertuunngorniartarneq atorineqalissasoq, ”ilinniarnertuunngorniartarneq”, taamaalilluni Kalaallit Nunaanni ilinniarnertuunngorniartarneq (GU), Kalaallit Nunaanni qaffasinnerusumik niuerneramik soraarummeertarneq (Hhx) aammalu qaffasinnerusumik teknikkikkut soraarummeertarneq (Htx) taarsissallugit. Ilinniarneq ukiunik 3-nik sivilisussuseqarpoq arfinilinnillu semestereqarluni.

Ilinniarnertuunngorniartarnerup Kalaallit Nunaanni, Danmarkimi nunanilu allani ilinniarnermik aallartitsinissamut piareersarfiusussatut nalinginnaasumillu perorsaataasumik ilinniarfiusussatut siunertaa siunnersuummi ingerlateqqinneqarpoq.

Ilinniarnertuunngorniartarfinnut piareersunut sanilliulluni Siunnersuut nutaaliornernik arlalinnik imaqarpoq:

1. Ilinniarnertuunngorniarnermik ataasiumik ilinniartitsissutissanilli immikkut ilinniarfiusinnaasunik pilersitsineq
2. Ilinniartitaanerup siunertaanik itinerusumik allaatiginninneq
3. Ilinniartunngorsinnaanermut maleruagassat nalorninangitsut
4. Ilusilersuineq nutaaq ataatsimoorussamik ingerlatsinertalik aamma ilinniarniakkanut assigiinngitsunut ingerlaqqissinnaaneq
5. Ilinniartitsissutissat nutaat
6. Ukiumut aalajangersimasumik piffissaqartitaanermik eqqussineq
7. Piumassuseq tunngavigalugu ilinniartinneqarsinnaanermut neqerooruteqarneq

8. Ilinniartitaaneq allamiut oqaasiinik ingerlanneqartutut perorsaaneq pillugu tunngaveqartitaq
9. Suleriaatsit perorsaanerlu pillugit itisilerlugit tunngavigisanik nalunaarsuineq
10. Ilinniartitsisooqatigiinnik aallartitsineq
11. Ilinniartifiup siunnersuinnermut pisussaaffiinik nukittorsaaneq
12. Immikkut aaqqissukkamik ingerlatsisinnaanerup nukittorsarneqarnera
13. Angajoqqaanut atassuteqarnissamik piunasaqaateqarneq aamma ingerlaavartumik nalilersuisarnermik erseqqissaaneq
14. Ilinniartitsisut rektorillu piginnaasassaannik piunasaqarneq aamma akisussaaffinnik erseqqissaaneq
15. Siunnersuisooqatigeeqarnermut maleruagassanik suliaqarneq (ilinniartitsisut aamma ilinniartut siunnersuisooqatigiivi)
16. Ilinniarnertuunngorniarfinni ataasiakkaani pitsaassutsimik inerisaanermik aamma angusanik nalilersuisarnermik qulakkeerinnineq.

Siunnersuummut tunngavigineqartup siunnersuummilu qitiutinneqartut annertunerusumik paasisaqarfiginissaannut siunnersuummut nassuiaatit aamma innersuussutigineqarput.

Inatsit 1. august 2012-imi atuutilissaaq, taamaattorli kapitali 2 ilinniarnissamut akueritittarnermut tunngasoq 1. januar 2012-imi atuutilissalluni.

### **Siunnersuutip Inatsisartunit siullermeerneqarnera**

Siullermeerlugu suliarineqarnerani inatsisartunit siunnersuut nalinginnaasumik iluarisimaarneqartoq ataatsimiititaliap maluginiarppaa, kisianni partit ataasiakkaat ilaatigut imatut oqaaseqaateqarlutik.

### **Inuit Ataqtigiit.**

Inuit Ataqtigiit kissaatigaat timersorneq ilinniarnernerup ukiuisa aappassaanni aalajangersimasumik pisartussat atuartitsissutaasalissasoq. Ilanngullugulu Partip nutarterinnermut atatillugu Kultur pillugu atuartitsissutitut atuutilerpera nutaaliornertut annertuutut isigaa.

**Siumut**

Siumumit pingaartinneqarpoq, Kalaallit oqaasiisa pingaartinneqarnissaat, aammalu ilinniarnertuunngorniarluni ilinniarnep Kalaallit Nunaannut naleqqussarneqarnissaa. Ilanngullugulu Siumumit pingaartinneqarluni, ilinniartunik siunnersuisarnerup tapersuisarnerullu annertusarneqarnissaa, taamaalilluni ilinniartut maanaannaq anisarnerat sapinngisamik pinngitsoorniarneqassamat.

**Demokraatit**

Demokratinit pingaartinneqarpoq, Ilinniarnertuunngorniarnut aningaasaliissutit ikilisarneqannginnissaat, aammalu malittarisassat ingerlaavartumik suliarineqartarnissaat, ilinniarnep maanaannaq anisarneq pinngitsoortinniarlugu.

**Atassut**

Taamatuttaaq Atassumit pingaartinneqarpoq ilinniartut ilinniarnep ingerlatsiinnarnissaat aalajangiusimaneqassasoq, aammalu maanaannaq anisarnep annertuup pakkersimaarneqarnissaa, ilaatigut ilinniartut ataasiakkaat atugaasa nakkutigineqarnerisigut. Aamma Atassutip tikkuarpaaa, ukiuni sisamani ingerlanneqarsinnaasup "Team Greenland forløb"-ip eqqunneqarsinnaaneranut periarfissaq.

**Kattusseqatigiit Partiat**

Kattusseqatigiit Partiat isumaqarpoq, ilinniartunut atugassaritneqartut pitsaanerumik qulakkeerneqarnissaat aammalu ilinniarnertuunngorniarnep ilinniartut pitsaanerumik piareersarneqartarnissaat.

Inatsissatut siunnersuut pillugu apeqqutit assigiinngitsut siullermeerlugu suliarineqarnerani Kultureqarnermut, Ilinniartitaanermut, Ilisimatusarnermut, Ilageeqarnermullu Naalakkersuisumut saqqummiunneqarput. Apeqqutinut taakkununga akissutini pillugit Naalakkersuisoq ulloq 30. september 2011-mi allagaqarluni ataatsimiititaliamut ilisimatitsivoq.

**(ilanngussaq 1-tut ilanngunneqarpoq).**

**Tusarniaanermut akissutit**

Siunnersuut piffissami 25. maajimiit 29. juunimut 2011-mi suliamut attuumassuteqartunut tusarniutigineqarpoq. Tusarniaaneq piffissami atuarfinni sulisut soraarummeernernik aasaanerani atuanggiffeqarnissamut ulapputeqarnerisa nalaani ingerlanneqarsimasoq ataatsimiititaliamit maluginiarneqarpoq. Tamannali tusarniaanerup pitsaassusianut annertuumik sunniuteqarsimasutut ataatsimiititaliamit isigineqanngilaq.

Tusarniaanermut akissutit tiguneqartut siunnersuutip annikitsunik allanngortinnissaanut tunngavissaqartitsilersimapput. Tusarniaanermut akissutit inatsisissatut siunnersuummut ilanngunneqarsimapput, tamannalu iluserititassat pillugit Inatsisartut Siulittaasoqarfiannit piumasqaataasunut naapertuuppoq. Tusarniaanermi akissutinut takussutissaq ataatsimoortoq Naalakkersuisoqarfiup oqaaseqaatai ilanngullugit Ilinniartitaanermut Ilisimatusarnermullu Naalakkersuisoqarfimmit suliarineqarsimavoq.

**Siunnersuutip ataatsimiititaliamit suliarineqarnera**

Inatsisissatut siunnersuutip suliarineqarneranut atatillugu piareersaataasumik sulineq annertoq, suleqatit suliamut attuumassuseqartut suleqatiginerisigut, ingerlanneqarsimasoq ataatsimiititaliamit maluginiarneqarpoq. Naalakkersuisut Aningaasaqarnermut Ataatsimiititaliamut allakkani ulloq 9. oktober 2009-meersuni akissutaat ataatsimiititaliamit maluginiarneqarpoq, taakkunani paasissutissiissutigineqarluni Naalakkersuisut ilinniartitaanermik aqqissusseqqinnermik suliaqarneranni ilinniarnertuunngorniarfinni tamani ilinniakkat qaffasissusiannik qaffatsitsinissaq siunertatut pingaarnerutinneqartoq. Taamaattumik aamma qulakkeerneqartariaqarpoq ilinniarnertuunngorniarluni ilinniakkat qaffasissusiat ima pitsaassuseqassasoq inatsisip siunertaa eqqortoq atulersinneqarsinnaalluni, tassungalu ilanngullugu qulakkeerneqarluni ilinniarnertuutut soraarummeernerup Kalaallit Nunaanni, Danmarkimi nunanilu allani ilinniaqqinnissamut atorineqarsinnaanissaa. (§ 1 imm. 2).

Ataatsimiititaliaq isumaqarpoq, aaqqiineq ilinniartut semesteri siulleg ataatsimut tunngaviummik ilinniartinneqarnissaat, kinguneranillu GU-mut "ilisarititsineq"-rup ingerlanneqarnissaa, ilinniartitaanerup aallartinneqarnerani pitsaassusioq., taamaalillutillu ilinniakkanik imminnut pitsaanerutitaminnik toqqaasinnaalissallutik. Ataatsimiititaliaq isumaqarpoq, taamaaliornikkut ilinniartut ataasiakkaat piginnaasaat qaffassarneqassasut,

taamaalillutik namminneq soqutigisatik aallaavigalugit immikkoortunut ilinniartitseriaaseq iliniartunut tunnganerusunngorlugu allanngortinneqarsimavoq, ilinniartitsisut ilinniartut ataasiakkaat naatsorsuutigisaat ilinniakkaminnilu piginnaasaat aallaavigalugit sulisinnaallutik. Tassunga atatillugu Ataatsimiititaliamit pitsaasutut isigineqarpoq, fagini tamani ilinniartitsineq tunngaviummik allat oqaasiinik atuilluni perorsaanermi imatut atorneqalersimammat, ilinniartut oqaatsit kalaallisut aamma allamiut oqaasii atorlugit oqariartaatsit ilisimalerlugit.

Peqatigalugulu ilinniartitseriaaseq iliniartunut tunnganerusunngorlugu allanngortinneqarsimavoq, ilinniartitsisut ilinniartut ataasiakkaat naatsorsuutigisaat ilinniakkaminnilu piginnaasaat aallaavigalugit sulisinnaallutik. Tassunga atatillugu Ataatsimiititaliamit pitsaasutut isigineqarpoq, fagini tamani ilinniartitsineq tunngaviummik allat oqaasiinik atuilluni perorsaanermi imatut atorneqalersimammat, ilinniartut oqaatsit kalaallisut aamma allamiut oqaasii atorlugit oqariartaatsit ilisimalerlugit.

**Ataatsimiititaliami Ilinniarnertuunngorniarfinni aaqqissuusseqqinnermik suliaqarnermut atatillugu, Ataatsimiititaliaq Nuummi ilinniarnertuunngorniarfimmu paasisassarsiorluni pulaarsimavoq,** pulaarnermi aqutsisut sulisullu ilinniarnertuunngorniarfimmu aaqqissuusseqqinnermi piviusunngortitsinniarnermi isummatik suliatillu saqqummiullugit. Peqataasut tamarmik malittarisassat nutaat malillugit sulilernissaminnut qilanaarnertik oqaatigaat. ( Ilanngussaq 3-tut ilanngunneqarpoq Nuummi Ilinniarnertuunngorniarfimmu paasisassarsiorluni pulaarnermi nalunaarsuiaq)

**Inatsisissatut siunnersuummut ataatsimiititaliaq imatut oqaaseqaateqarpoq:**

- § 28, imm. 6-imi oqaaseqatigiit aappaat ataatsimiititaliamit ima paasineqarpoq; ilinniartitseriaaseq ilinniartitsisut ilinniartut ataasiakkaat naatsorsuutigisaat ilinniakkaminnilu piginnaasaat aallaavigalugit sulisinnaallutik. Tassunga atatillugu Ataatsimiititaliamit pitsaasutut isigineqarpoq, fagini tamani ilinniartitsineq tunngaviummik allat oqaasiinik atuilluni perorsaanermi imatut atorneqalersimammat, ilinniartut oqaatsit kalaallisut aamma allamiut oqaasii atorlugit oqariartaatsit ilisimalerlugit.
- § 29-mi ilinniakkatut sammiviit suut ilinniarnertuunngorniarfinni ataasiakkaani neqeroorutiginiarneqarnersut ilinniarnertuunngorniarfinit ukiut tamaasa aalajangerneqartarnissaa, taamaalilluni ilinniakkap ingerlanera piffissaq tamaat ilinniartup kissaatai pisariaqartitaalu tunngavigalugu ingerlasinnaallutik, ataatsimiititaliamit tunngavilersorluagaasutut isigineqarpoq. Naalakkersuisut ilinniakkatut sammivinnik pilersitsinissamut sinaakutissanik maleruagassiornerminni ilinniakkat qinnuteqarfigineqarnerpaat eqqarsaatigalugit ilinniartut qinigassatut periarfissaasa nunap immikkoortuini assigiinngippallaalinnginnissaat sapinngisamik isiginiassagaat ataatsimiititaliamit erseqqissarneqassaaq.

- Ukiut sisamat ingerlasussamik “Team Greenland forløb”-imik pilersitsiniarneq, ataatsimiititaliamit § 42-imi malittarisassat tunngavigalugit ingerlanneqarsinnaasut isineqarpoq.
- § 46, imm. 1-imi oqaaseqatigiit “... aalajangerneqartumik oqaluttariarsornermik allattariarsornermillu misilitsinnerit arlaqartut” ataatsimiititaliamit imatut paasineqarput ilinniarnertuutut soraarummeernermi oqaluttariarsornermik aammalu allattariarsornermik misilitsinnerit ataatsikkut aalajangersarneqarnissaannut periarfissaqartoq. Kiisalu misilitsinnerit amerlassusissaasa Naalakkersuisunit aalajangersarneqartarnissaat pissusissamisoortutut ataatsimiititaliamit isigineqarpoq, tamatumani naatsorsuutigineqarluni ilinniartitaanerni assigiinngitsuni misilitsinnerit amerlassusissaat ima aalajangersarneqarsimassasut soraarummeernerit nalunassusiat taasungalu atatillugu misilitsinnerit ilinniartitaanerni ataasiakkaani ukiumit ukiumut sanilliunneqarsinnaallutik.
- Inatsisissatut siunnersuutip siullermeerlugu oqaluuserineqarnerani oqaatigineqarpoq timersorneq tunngaviumik ilinniakkap ingerlanneqarnerani taamaallaat pinngitsoorani peqataaffiussasoq. Timip aalatittarneratigut ilinniartut ilikkarsinnaassusiat annertunerusarneranik naatsorsuutiginninneq eqqarsaatigalugu tunngaviumik ilinniakkap kingorna timersornerup ilinniartitsinermi aamma pingaartillugu ilanngunneqarnissaa ataatsimiititaliamit kaammattuutigineqarpoq.
- Ilinniarnertuunngorniartarni ilinnialernissamut inatsisissatut siunnersuummi piumasaqaatit pillugit ataatsimiititaliaq maannangaaq oqaaseqaatissaqanngilaq, isumaqarlunili ilinniarnertuunngorniartarneq pillugu inatsisip nutaap atuutilernerata kingorna kingusinnerpaamik ukioqatigiit siulliit ilinniarnertuunngorlutik soraarummeerneranni piumasaqaatinik atuinermi ilinniartitsinermit misilittagaat ilinniartussatut akuerisat ilinniarnernimillu maanaanaq unitsitsisartut amerlassusiannut sanilliullugit naliliiffigineqassasut.

Ataatsimut isigalugu ataatsimiititaliaq isumaqarpoq, ilinniarnertuunngorniartarluni ilinniartut akornganni maanaanaq unitsitsisarneq annertuumik annikillisarneqassasoq. Tassunga atatillugu ilinniartunik siunnersuisarneq aamma ilinnialinnginnermi, ilinniarnertuunngorniartarluni ilinniarnernerup nalaani salliutinneqarluninartariaqarmat, **ataatsimiititaliarlu isumaqarpoq, pineqartoq naammattunik aningaasaliiffigineqartariaqartoq, taamaalillutik ilinniartunut siunnersortit ilinniarnissartik pisariaqartoq sakkussallu tamatumunnga pisariaqartinneqartut pissarsiariniassammatigit, siunnersuineq makkuninnga ilaqartinneqartarmat, inuusuttut amerlasoorpassuit angerlarsimaffitik qimallugit ilinnialertariaqartarmata.** Tassunga atatillugu Ataatsimiititaliamit pingaartorujussuurtut isigineqarpoq, ilinniartitsisoqatigiit ilanngullugit isumagissagaat, klassini toqqissisimanissaq aammalu

ilinniartut atuarfimmi imaluunniit ilinniartut angerlarsimaffiiniittut toqqissisimangitsut kanngusaarneqannginnissaat. **Ataatsimiititaliamit ilanngullugu pingaartut isigineqarpoq, ilinniartut pisariaqartitsisut ilaqutariinnik attaveqaaataasunut attaveqalernissaannut periarfissaqalernissaq.**

Kingullertullu ataatsimiititaliaq isumaqarpoq, ilinniartitsinermi GU-mi aaqqissuusseqqinnermi atortut naleqqussakkat pingaartinneqartariaqartut.

### **Siunnersuutip aningaasatigut kingunissai**

Siunnersuutip piviusunngortinnerani aningaasatigut kingunissai siunnersuummut nalinginnaasumik nassuiaatini erseqqinnerusumik nassuiaatigineqarsimangillat aammalu inatsisip piviusunngortinneqarnerani aningaasartuutit 2012-imi aningaasanut inatsimmi aningaasaliissutigineqartunit matussuserneqarsinnaassanersut ataatsimiititaliamit takuneqarsinnaanngilaq. 2012-mi aningaasanut inatsisissatut siunnersuummi qupperneq 78-mi ilisimatitsissutigineqarpoq ilinniarnertuunngorniartarnermik aaqqissuusseqqinneq aatsaat piviusunngortinneqarsinnaasoq ilinniartitaanermit tunngassuteqartuni tunngavissat tamatuminnga periarfissiinerat malillugu.

Aningaasaqarnermut Naalakkersuisoqarfiup tusarniaanermut akissutaanut oqaaseqaatini paasissutissiissutigineqarpoq ilinniarnertuunngorniartarneq pillugu inatsisissatut siunnersuutip aningaasalersorneqarnissaa pillugu 2012-imi aningaasanut inatsisissatut siunnersuutip aappassaaneerneqarnissaanut Naalakkersuisut allannguutissatut siunnersuummik saqqummiussissasut. Taamaattumillu konto pingaarnermi 20.11.61-imi sillimmatitut immikkoortinneqartut saniatigut ilinniarnertuunngorniartarnermik aaqqissuusseqqinnerup piviusunngortinnissaanut aningaasat suli qanoq amerlatigisut nassariniarneqarnissaat aammalu aaqqissuusseqqinnerup piviusunngortinneqarnissaata kinguartinneqarnera ilinniartitaanikkut immikkut iliuseqarnermi anguniakkanut qanoq kinguneqarsinnaanersoq suli nalunarpoq.

Naalakkersuisut ukioq 2012-imut Aningaasanut Inatsisissatut siunnersuummut allannguutissatut siunnersuutaat kiisalu Aningaasaqarnermut Ataatsimiititaliamit apersorneqarnermini Naalakkersuisup akissutai 26. oktober 2011-imeersut ilanngussaq 2-tut



isumaliutissiisummut ilanngunneqarput. Tassannga allannguutissatut siunnersuutit ukuullutik.

Qulaani pineqartoq Aningaasaqarnermut Ataatsimiititaliamut akissut **Ataatsimiititaliamit tusaatissatut tiguneqarpoq, tassa Ataatsimiititaliap akissut imatut paasivaa, periarfissaqartoq GU-imi aqqissuusseqqinnermi “suliaq oqitsoq” isumannaatsumik atorneqarnissaa periarfissaalissasoq, ukioq 2012-imut Aningaasanut Inatsisissatut siunnersuummi allannguutissat Inatsisartunit akuersissutigineqassagaluarpata.**

**Ataatsimiititaliap inassuteqaatai**

**Ataatsimiititaliaq isumaqatigiittoq** inatsisissatut siunnersuutip saqqummiunneqartup Inatsisartunit aappassaaneernejarnerani akuerineqassasoq **inassuteqarpoq.**

Taamatut oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

---

Jane Petersen  
Siulittaasoq

---

Niels Thomsen  
Sinniisussaq

---

Hans Aronsen

---

Ruth Heilmann

---

Aleqa Hammond